

21. november 2013

UKA 2013/138  
Per Berthelsen

**Naggueqatigut eqqarsaatigalugit ullumikkornit qanimut pimoorunnerullugu qaninnerusumillu sutigut tamatigut qanoq suleqatiginerulersinnaarat siunertaralugu oqalinnissamik siunnersuut.**

(Inatsisartunut ilaasortaq Randi Broberg, Partii Inuit)

Randi Brobergip Partii Inuit-neersup naggueqatitsinnik qaninnerusumik suleqateqarsinnaanitsinnut tunngatillugu apeqquteqaat aallaavigalugu oqallisissatut siunnersuummik saqqummiussivoq.

Siunnersuummi oqaatsit qulequttami taaneqartut kisimik atorneqarmata, matumani Inuit Canadami, Inuipiat immaqalu Alaskami Yuppiit pineqartut naatsorsuutigaarput.

Siumup siunnersuuteqartoq isumaqatigaa oqarmat uagut kalaallit inuillu pineqartut amerlasuutigut assigiissuteqartugut taamaattumillu sorpassuartigut suleqatigiissinnaasugut paarlasseqatigiissinnaallutalu.

Tamannamiuna ilaatigut tunngavingalugu ICC 1977-imi pilersinneqartoq.

Kingorna Nunavumi naggueqatigvut namminerisaminnik inatsisartoqalermata, inatsisartutigoortumik suleqatigiilersinnaaneq siunnersuutigineqarsimagaluarpoq. Kisianni Canadap naalagaaffiata Naalakkersuisui avaqqullugit suleqatigiinnernik ingerlatsisoqarsinnaannginera pissutigalugu suleqatigiissinnaaneq piviusunngortinneqarsinnaasimangilaq.

Siunnersuummi taamaattumi pitsaasumik siunertaqartumi, illuatungeriinni ataasiinnaap anguniakkanik anguneqarnissaanut ilungersortarnera ajornartorsiutaakkajuppoq, taamaallillunilu isumassarsiat piuumassuserlu taamaasiornikkut qatangiinnartinneqarsinnaasarlutik, Siumulli isumaqanngilaq pissutsit taamaattut uniffigiinnarneqassasut, taamaammallu attaveqaataasinnaasunut suleqatigiinnissamullu periarfissat pillugit oqaloqatigiissinnaanermut matunik ammatitsisariaqarpugut. Anguniakkammi ilaat ukiut ingerlaneranni iluatsittarput.

Suliniutit ilaat iluatsittoq eqqaamasara tassaavoq, ilinniartitsisunik paarlasseqatigiittarnermik aaqqissuussineq – minnerunngitsumik eqqumiitsuliornermut tunngasuni. Taakkulu uagut naggueqatigiit akornanni iluatsittutut pigisigit, ingerlaqqinnissamut qaammarsaatis-savut kiisalu naggueqatigiit akunnitsinni attaveqaatinik pitsanngorsaatis-satut.